

Tātarakihi

Nā Te Aorere Riddell


Whatukura

He Whakatau

Me mātua pānui kia mārāma rawa koe i ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. Pātai anō ai koe ki a koe, he aha te tātarakihi e kekekeke rā i ngā pō. Ko te uwaha, ko te tāne rānei e mahi rā i tana mahi. He aha te rerekētanga o tēnei momo ki ētahi momo kē atu. Kāti kei te koroua o Māhaki ētahi whakautu.



He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Kātahi nei te miharo kō te tātarakihi me tōna kōhiwi. Me matapaki rawa ngā momo kōhiwi o ngā ngārara. Ahakoa te kararehe, te ngārara, te manu, te ika, te tangata he kōhiwi katoa o rātou. Nō reira he aha e rerekē nei te tātarakihi? Me kōrero rawa hoki mō ngā wāhanga o te tinana o te tātarakihi, tae atu ki ana oro. Kia kite hoki te ākonga i te hononga o te tātarakihi ki tōna ake taiao.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e mārāma ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini whitireo, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. Kei hea te kōhiwi o te tātarakihi?
2. He aha te tino rerekētanga o te kōhiwi tātarakihi, me te kōhiwi o te tangata?
3. Pēhea te whakaaro a te tātarakihi i tana waiata?
4. He aha i tino wāwahi ai te tātarakihi i tana kōhiwi tawhito?
5. He pēhea te roa o te huringa oranga o te tātarakihi?

Ngā whakautu ki ngā whakapuaki māramatanga

1. Kei waho i tana tinana.
2. Ko te kōhiwi o te tātarakihi, kei waho o te tinana, ko te kōhiwi o te tangata kei roto i te tinana.
3. Mā te paki a ō rātou piunga parirau.
4. He maha ngā whakautu rerekē.
5. He maha ngā whakautu rerekē.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuatanga o te pukapuka nei.

Te pūtake

T He tautuhi, he tipako, i ngā kōrero pūmau.

He whakatakinga ā-roro, he whakaharatau

Kia mārāma ai te ākonga he aha te kōrero pūmau me mātua matapaki te rerekē o te pūmau me te auaha. Ko te kōrero pūmau he kōrero pono. Ko te kōrero auaha he kōrero mai te manawa, mai te hinengaro. Me tipako ngā kōrero pūmau, ka matapaki ai he aha i pūmau ai. Kia taunga kia mōhio ngā ākonga he aha te kōrero pono, ka tuhi ai i tō rātou reo ake ki tētahi tūtohunga. Anei ētahi o ngā tauira mai te pukapuka:

- Kei waho te kōhiwi o te tātarakihi i tōna tinana.
- Waiata ai te tātarakihi i te wā o te raumati.

Tipakohia mai kia rima anō.

Me mahitahi te pouako me te ākonga ngā whārangi whakaatu kōrero pūmau kia taunga rā anō, kātahi ka mahi takitahi ai. Me tuhi i tētahi pukapuka nunui, pānuitanga nunui rānei hei whakaatu ki te akomanga.